

## **IMYANZURO Y'INAMA Y'IGIHUGU Y'UMUSHYIKIRANO YA 14**

### **UKUBOZA, 15-16, 2016**

---

Ku itariki ya 15 n'ya 16 Ukuboza, 2016 i Kigali muri Convention Center hateraniye Inama y'Igihugu y'Umushyikirano ya 14 ifite insanganyamatsiko igira iti: **“Dufatanyije, Twubake u Rwanda Twifuza”**.

Inama yahujwe n'Ijambo Nyakubahwa Perezida wa Repubulika ageza ku Banyarwanda buri mwaka agaragaza uko Igihugu gihagaze (State of the Nation), n'Inama Ngishwanama ya gatanu ya Komisiyo y'Igihugu Ishinzwe Kurwanya Jenoside.

Mu ijamba ritangiza Inama, Nyakubahwa Perezida wa Repubulika yamenyesheje Abanyarwanda ko u Rwanda ari Igihugu gihagaze neza, gifite umutekano kandi gikomeje gutera imbere. Yibukije kandi ko Abanyarwanda tuzakomeza kubakira kubyo twagezeho birimo umutekano n'icyizere Abanyarwanda bafitiye Inzego z'Igihugu dushingiye ku ntego yacu: Ubumwe, Umurimo no Gukunda Igihugu.

Nyakubahwa Perezida wa Repubulika yibukije ko n'ubwo twishimira ibyo twagezeho tudakwiye kwirara kuko urugendo rugikomeje, kandi ko dukwiye no kwigira ku byiza bikorerwa ahandi.

Muri iyi nama hatanzwe ibiganiro bikurikira:

- a) Raporo ku ishyirwa mu bikorwa ry'imyanzuro yafatiwe mu Nama y'Igihugu y'Umushyikirano ya 13;
- b) Ibyo Twagezeho : Umusaruro w'Ubumwe no Kwishakamo Ibisubizo;
- c) U Rwanda Twifuza;
- d) Kugira u Rwanda rutarangwamo ingengabitekerezo ya Jenoside.

Nyuma yo kungurana ibitekerezo hafashwe imyanzuro ikurikira:

- 1.** Kugena igihe ntarengwa u Rwanda ruzagera ku rwego rwo kwihaza mu ngengo y'imari, dushingiye ku cyerekezo 2050, twongera umurego mu gukora cyane, kubazwa ibyo dukora (accountability), no kunoza imikoranire hagati y'inzego zose (sectoral coordination).
- 2.** Gukomeza kwubaka ubudasa bw'u Rwanda bushingiye ku miyoborere myiza dukomeza kwihitiramo no gushyigikira ubuyobozi butubereye kandi bufite icyerekezo (visionary leadership), no gukomeza umuco wo kwishakamo ibisubizo, kuwumenyekanisha no kuwuherekeranya mu badukomokaho.
- 3.** Gushimangira ubufatanye hagati y'Inzego za Leta, ababyeyi, abarezi, abikorera, sosiyete sivile n'imiryango ishingiye ku madini mu kurushaho kubaka Umuryango nyarwanda.
- 4.** Gushyira imbaraga mu kongerera agaciro ibikorera mu Rwanda no kubishakira amasoko mu Rwanda no mu mahanga.
- 5.** Gukomeza kunoza imitangire ya serivisi mu nzego za Leta no mu bikorera, abahabwa serivisi mbi bakabyanga kandi bakabigaragariza ababishinzwe kugirango bikosorwe;
- 6.** Gushyiraho no gushyigikira gahunda y'Urunana rw'Urungano mu Turere twose tw'Igihugu no kugeza gahunda y'itorero ry'Igihugu mu byiciro byose by'Abanyarwanda harimo abakuze baba mu mahanga n'abafite n'ubumuga.
- 7.** Gutegura neza imishinga minini yo kuhira imyaka cyane cyane mu Turere twa Nyagatare, Gatsibo, Kayonza na Kirehe.
- 8.** Gushaka uburyo bwo kwegereza ibiro by'itora Abanyarwanda batuye mu mahanga.

9. Gukomeza gusigasira no kurinda ubumwe bw'Abanyarwanda turwanya ingengabitekerezo ya Jenocide by'umwihariko mu rubyiruko.
  10. Gukomeza gushyira imbaraga mu guhangana n'ibikorwa bibera mu muhanga bigamije gupfobya no guhakana Jenocide yakorewe Abatutsi.
  11. Gukora ubushakashatsi bugamije kumenya mu buryo bwimbitse ikibazo cy'ihungabana mu bacitse ku icumu rya Jenocide kugirango gifatirwe ingamba zihamye.
  12. Gushakira umuti ukwiye inzitizi zibangamira irangizwa ry'imanza zisigaye zaciwe n'inkiko Gacaca ku mitungo yangijwe mu gihe cya Jenocide yakorewe Abatutsi.
-